

四庫全書

史部

欽定四庫全書

史部

欽定續文獻通考卷三十三

編修<sub>臣</sub> 翟槐覆勘

總校官內閣中書<sub>臣</sub> 孫溶

欽定四庫全書

欽定續文獻通考卷二十三

征權考

坑冶

宋理宗端平三年九月詔諸路州縣坑冶毋擾害民

先是孝宗淳熙十年六月廣西運司奏昭州金坑五  
遞年所入不多乞廢罷以裕民遂罷昭州歲貢金光  
宗紹熙二年八月寬兩淮權鐵之禁至是祀明堂大

赦詔曰諸路州縣坑冶興發在觀寺祠廟公宇居民  
墳地及近墳園林地者法不許人告亦不得受理訪  
聞官司利於告發更不究實多致擾害自今許人戶  
越訴官司并訟者重置典憲及有坑冶停閉苗脉不  
發之所州縣勒令坑戶虛認歲額提點鑄錢司覈實  
追正

宋史陳俊卿傳曰孝宗朝俊卿參知政事時四明  
獻銀礦將召冶工即禁中鍛之俊卿奏不務帝王

之大而屑屑有司之細恐為有識所窺罪之

又趙必愿傳曰寧宗時必愿移泉州罷白土課及  
免差吏權鐵

臣等謹按坑冶誅求抑勒有極擾民者紀載紹定  
五年五月臣僚言積陰霖淫自夏徂秋疑必有致  
咎之徵比聞蘄州進士馮杰本儒家都大坑冶司  
抑為鑪戶誅求日增杰妻以憂死其女繼之弟大  
聲因赴愬死於道路杰知不免毒其二子一妾舉

火自經而死民冤至此豈不上干陰陽之和乃詔  
罷都大坑冶魏峴職觀此則理宗時坑冶之害有  
不可勝言者矣

遼太祖五年十月置鐵冶

帝始併室韋其地產銅鐵金銀其人善作銅鐵器又  
有特穆爾部者多鐵

特穆爾國語鐵也

部置三冶曰柳濕河

曰三黜古斯曰手山

神冊初平渤海置採鍊鐵戶

時得廣州本渤海鐵利府改曰鐵利州地亦多鐵東平縣本漢襄平縣故地產鐵卅置採鍊者三百戶隨賦供納以諸坑冶多在國東故東京置戶部司長春州置鐵帛司又帝征幽薊師還次山麓得銀鐵卅命置冶

遼史地理志曰銀州本渤海富州太祖以銀冶更名所屬新興縣即渤海置銀冶地又太祖伐渤海遷其民於遼城建長樂縣戶四千內一千戶納鐵

澤州本漢土垠縣地太祖俘蔚州民立寨居之採  
鍊陷河銀冶

太宗時置五冶太師

自太祖之父撒剌的以土產多銅始造錢幣後遂襲  
用之以開帝業至是乃設官以總四方錢鐵

聖宗太平五年十二月禁工匠不得銷毀金銀器

七年五月西南路招討司奏陰山中產金銀請置冶從  
之復遣使循遼河源求產金銀之所



遼史食貨志曰帝於潢河北陰山及遼河之源各  
得金銀卅興冶採鍊自此以迄天祚國家皆賴其  
利

又國語解曰山金司以陰山產金置冶採鍊故以  
名司後改為統軍司

興宗重熙二年十二月禁夏國使沿路私市金鐵  
道宗清寧九年正月禁民鬻銅

十年十一月禁南京不得私貨鐵

咸雍六年十一月禁鬻生熟鐵於回紇準布等界

金海陵天德四年十一月買珠於烏爾古德呼勒部及  
扶餘路禁百姓私相貿易仍調兩路民夫採珠一年

正隆二年十月初禁銅越外界

以議鼓鑄故也

三年二月遣使檢視隨路金銀銅鐵冶

時初置錢監因有是命

世宗大定三年制金銀坑冶許民開採百分中取一為

稅金銀稅互  
見征商門

五年聽人射買寶山縣銀冶

九年七月罷東北路採珠

十二年正月以銅少命尚書省遣使諸路規措銅貨能  
指坑冶得實者賞

至十六年三月又遣使分路訪察銅礦苗脉

金史食貨志曰正隆而降始議鼓鑄民間禁銅甚  
至銅不給用漸興窰冶凡產銅地脉遣吏境內訪

察無遺且及外界而民用銅器不可闕者皆造於官而鬻之既而官不勝煩民不勝病乃聽民冶銅造器而官為立價以售此銅法之變也

十二月詔金銀坑冶聽民開採毋得收稅

二十七年尚書省奏聽民於農隙採銀承納官課

金史張大節傳曰大定中定襄退吏誣縣民匿銅者十八村大節為戶部郎中廉得其實抵吏罪民斷石頌之章宗時授震武軍節度使部有銀冶有

司以為爭盜由此生付衆議皆以官權為便大節  
曰山澤之利當與民共且貧而無業者雖嚴刑能  
禁其竊取乎宜明諭民授地輸課則其游手者有  
所資於官亦便從之

二十九年十二月

時章宗  
已即位

甄官署丞丁用楫言開採銅

礦之弊

時立代州曲陽二錢監雁門五臺民訴自立監鑄錢  
以來有銅礦之地雖曰官運其產直不足則令民共

償乞與本州司縣均為差配遂命用楫往審其利病  
還言所運銅礦民以物力科差濟之實非所願雇直  
既低更有刻剝之弊而相視苗脉工匠妄指人之垣  
屋及寺觀謂當開採因以取賄又隨冶工匠日辦淨  
銅四兩多不及數復銷銅器及舊錢送官以足之病  
民多費未見利便遂罷二監

章宗明昌三年禁採銅於天山界外

舊嘗以夫匠逾天山北界外採銅至是監察御史李

炳言頃聞有司奏在官銅數可支十年若復每歲令夫匠過界遠採不惟多費復恐或生邊釁若支用將盡之日止可於界內採鍊帝是其言遂不許出界

三年以提刑司言封諸處銀冶禁民採鍊

五年九月初令民撲買隨處金銀銅冶

御史臺復奏請令民採鍊隨處金銀銅冶帝命尚書省議之宰臣議謂國家承平日久戶口增息雖嘗禁之而貧人苟求生計聚衆私鍊上有禁之名而無

杜絕之實故官無利而民多犯法如令民射買則民壯者為夫匠老稚供雜役各得均齊而射買之家亦有餘利如此則可以久行比之官役雇工糜費百端射有間矣遂定制有治之地委謀克縣令藉數召募射買禁權要官吏弓兵里胥皆不得與視舊場之例令州府長官一員提控提刑司訪察而禁治之帝曰此終非長策參知政事胥持國曰今姑聽如此後有利然後設官可也譬之酒酤蓋先為坊場而後官權也



帝亦以為然遂從之墳山西銀山之銀窟凡百一十有三

宣宗興定三年七月汝州魯山寶豐鄧州置鐵冶

從攝京西路三司李復亨奏也復亨言民間銷毀農具以供軍器臣竊以為未便汝州魯山寶豐鄧州南皆產鐵募工置冶可以獲利且不厲民詔尚書省行之

元興凡金銀珠玉銅鐵水銀朱砂碧甸子鉛錫之類皆

因土人呈獻而定其歲入之課

金之所產在腹裏曰益都檀景遼陽省曰大寧開元  
江浙省曰饒徽池信江西省曰龍興撫州湖廣省曰  
岳澧沅靖辰潭武岡寶慶河南省曰江陵襄陽四川  
省曰成都嘉定雲南省曰威楚麗江大理金齒臨安  
曲靖元江羅羅會川建昌德昌栢興烏撒東川烏蒙  
銀之所產在腹裏曰大都真定保定雲州般陽晉寧  
懷孟濟南寧海遼陽省曰大寧江浙省曰處州建寧

延平江西省曰撫瑞韶湖廣省曰興國郴州河南省曰汴梁安豐汝寧陝西省曰商州雲南省曰威楚大理金齒臨安元江

珠之所產曰大都曰南京曰羅羅曰碩達勒達曰廣州玉之所產曰于闐曰費里沙

銅之所產在腹裏曰益都遼陽省曰大寧雲南省曰大理潞江

鐵之所產在腹裏曰河東順德檀景濟南江浙省曰

饒徽寧國信慶元台衢處建寧化邵武漳福泉江西  
省曰龍興吉安撫袁瑞贛臨江桂陽湖廣省曰沅潭  
衡武岡寶慶永全常寧道州陝西省曰興元雲南省  
曰中慶大理金齒臨安曲靖潯江羅羅建昌鐵之在  
各省者獨江浙江西湖廣之課為最多凡鐵之等不  
一有生黃鐵有生青鐵有青瓜鐵有簡鐵每引二百  
斤

朱砂水銀之所產在遼陽省曰北京湖廣省曰沅潭

四川省曰思州

碧甸子之所產曰和林曰會川

鉛錫之所產在江浙省曰鉛山台處建寧延平邵武  
江西省曰韶州桂陽湖廣省曰潭州

太宗八年始置河東及檀景等處鐵冶

鐵在河東者是年立鑪於西京州縣撥冶戶七百六  
十燔之次年立鑪於交城縣撥冶戶一千燔之至世  
祖至元五年始立洞冶總管府七年罷之十三年立

平陽等路提舉司十四年又罷之其後廢置不常成  
宗大德三年九月置河東山西鐵冶提舉司十一年  
聽民煽鍊官為抽分武宗至大元年復立河東都提  
舉司掌之所隸之冶八曰大通興國惠民利國益  
國閏富豐寧豐寧之治有二仁宗延祐三年十月勅五臺雲  
驚寺置鐵冶提舉司

在檀景等處者是年始於北京撥戶煽之至世祖中  
統二年立提舉司掌之至元二十年十月罷北京鹽

鐵課提舉司其後亦廢置不常大德五年正月始併  
檀景三提舉司為都提舉司所隸之冶七曰雙峰暗  
峪銀崖大峪五峪利貞錐山

世祖中統三年正月諸王塔齊爾請置高麗鐵冶從之  
六月勅武寧府歲輸所產鐵又立小峪蘆子武寧軍赤  
泥泉鐵冶四所

四年正月領部阿哈瑪特請興河南等處鐵冶從之  
四月以漏籍戶一萬一千八百附籍四千三百於各

處起冶歲課鐵四百八十萬七千斤五月以禮部尚書馬伊克努爾領已括戶三千興煽鐵冶歲輸鐵一百三萬七千斤就鑄農器二十萬事易粟四萬石輸官河南隨處城邑市鐵之家仍舊鼓鑄至元九年五月減鐵冶戶十三年九月阿哈瑪特等以軍興國用不足議復立都轉運司量增課程元額鼓鑄鐵器官為局賣十九年二月立鐵冶總管府罷提舉司泰定帝致和元年六月罷河南鐵冶提舉司歸有司



鐵在濟南等處者是年拘漏籍戶三千煽之至元五年立洞冶總管府二十六年四月以萊蕪鐵冶提舉司隸山東鹽運司其後廢置不常至大元年復立濟南都提舉司所提之監五曰寶城通和昆吾元國富國順帝元統二年十一月以濟南萊蕪縣饑罷官鐵冶一年

在順德等處者至元二十五年八月以河間等路鹽運司兼管順德廣平棊陽三鐵冶三十一年撥冶戶

三千燭之大德元年設都提舉司掌之十一月以真  
定鐵冶隸順德都提舉司罷保定紫荆關鐵冶提舉  
司武宗至大元年閏十一月罷順德廣平鐵冶提舉  
司聽民自便有司稅之如舊三年正月復立廣平順  
德路鐵冶都提舉司至仁宗延祐六年始罷兩提舉  
司併為順德廣平彰德等處提舉司所隸之冶六曰  
神德左村豐陽臨水沙窩固鎮

元史刑法志曰諸鐵法無引私販者比私鹽減一

等杖六十鐵沒官內一半折價付告人充賞偽造  
鐵引者同偽造省部印信論罪官給賞鈔二錠付  
告人監臨正官禁治私鐵不嚴致有私鐵生發者  
初犯笞三十再犯加一等三犯別議黜降客旅赴  
冶支鐵引後不批月日出給引鐵不相隨引外夾  
帶鐵沒官鐵已賣十日內不赴有司批納引目笞  
四十因而轉用同私鐵法凡私鐵農器鍋釜刀鏹  
斧杖及破壞生熟鐵器不在禁限江南鐵貨及生

熟鐵器不得於淮漢以北販賣違者以私鐵論

至元二年二月令各路民戶從實淘金辦課毋得科斷鈔數

先是行省從長辦課未經定額許令椿配百姓包納每金一錢折價一十五兩至十八兩至是江南新附因科金課甚覺擾民御史臺以為言乃革淘金總管府併入宣慰司令民從實採辦

金在益都者至元五年閏正月命于從剛高興宗以

漏籍民戶四千淘於登州棲霞縣每戶歲輸金四錢  
十五年又以淘金戶二千僉軍者付益都淄萊等路  
淘金總管府依舊淘金其課於太府監輸納二十年  
十月遣官檢覈益都淘金欺弊二十六年十一月詔  
山東東路毋得沮淘金二十八年十一月禁沮擾益  
都淘金至成宗大德八年十二月復立益都淘金總  
管府文宗至順三年五月置山東益都等處金銀銅  
鐵提舉司

在遼陽者至元十年聽李德仁於龍山縣胡碧峪淘採每歲納課金三兩十三年又於遼東雙城及和州等處採之二十一年六月命伊蘇岱爾所部軍六十人淘金雙城仁宗延祐三年五月置遼陽金銀鐵冶提舉司七年英宗即位七月以遼陽金銀鐵冶歸中政院

在江浙者至元十九年十二月以建康淘金總管府隸建康路二十四年立提舉司以建康等處淘金夫

凡七千三百六十五戶隸之所轄金場凡七十餘所未幾以建康無金革提舉司罷淘金戶其徽饒池信之課皆歸之有司成宗元貞元年十一月立江浙金銀銅冶轉運司大德二年二月罷轉運司以淘金戶還元籍歲辦金悉責有司

在江西者至元二十三年撫州樂安縣小曹周歲辦金一百兩順帝元統元年十一月罷富州金課

在湖廣者至元二十年撥常德澧辰沅靖民萬戶付

金場轉運司淘馬

在四川者元貞元年九月以其病民罷其淘金戶四千還元籍罪初獻言者

在雲南者至元十四年諸路總納金一百五錠二十八年從參政怯刺言建都地多產金可置冶令旁近民鍊以輸官從之

刑法志曰諸產金之地有司歲徵金課正官監視人戶自執權衡兩平收受其有巧立名色廣取用



錢及多秤金數尅除火耗為民害者從監察御史  
廉訪使糾之

三年十二月立諸路洞冶所

四年正月立諸路洞冶都總管府專掌金銀銅鐵丹粉  
錫綠恢辦課程

凡係官撥戶興煽及見設官員自備工本洞冶並聽  
總管府催督若諸路山川有舊立洞冶都總管府即  
將所出之物取勘見數赴制國用使司入狀立額興

煽母許勢豪之家影占阻撓各處鑪冶戶供鑪礦炭等役所司不得擅行科差總管府設官吏合千人等所在官司如有相關公事同總管府取問歸斷

銀在大都者中統四年八月從博爾歡等請以宣德州德興府等處銀冶付匠戶歲取銀及石綠丹粉輸官至元十一年聽王庭璧於檀州奉先等洞採之五年令關世顯等於薊州豐山採之泰定帝泰定二年閏正月罷永興銀場聽民採鍊以十分之一輸官文

宗至順二年四月全寧民王脫歡獻銀礦詔設全寧銀場提舉司

在雲州者至元二十七年撥民戶於望雲煽鍊設官掌之二十八年又開聚陽山銀場十一月置望雲銀冶二十九年立雲州等處銀場提舉司成宗元貞元年二月立雲州銀場都提舉司武宗至大中巴圖魯斯言雲州朝河等處產銀令往試之得銀六百五十兩三年六月詔立上都中都等處銀冶提舉司以巴圖

魯斯為達魯噶齊十一月中書省言已圖魯斯去歲輸銀四千二百五十兩今歲復輸二千五百兩且言復得新礦銀當增辦乞加授嘉議大夫從之四年六月復雲州銀場提舉司英宗至治三年正月罷上都雲州興和宣德蔚州奉聖州及雞鳴山房山黃蘆三又沽金銀冶聽民採鍊以十分之一輸官

在遼陽者至元二十九年十月命趙德澤吳榮領逃奴無主者二百四十戶於廣寧瀋州耕田并淘銀仁

宗延祐二年四月諭晉王伊蘇特穆爾以先朝所賜  
惠州銀礦洞歸還有司至七月復賜之四年於惠州  
銀洞三十六眼立提舉司辦課

在江浙者至元二十一年建寧南劍等處立銀場提  
舉司煇鍊二十九年正月從江西行省左丞高興請  
罷福建銀鐵提舉司八月以福建行省叅政魏天祐  
獻計發民一萬鑿山鍊銀歲得萬五千兩而天祐賦  
民鈔市銀輸官私其一百七十錠臺臣請追其贓而

罷福建銀冶從之十二月中書省又言寧國路六百  
戶鑿山冶銀歲額二千四百兩皆市銀以輸官未嘗  
採之山乞罷之詔可成宗元貞元年三月罷福建銀  
場提舉司以有司領其歲額閏四月罷徽州路銀場  
在湖廣者至元十九年十二月罷湖廣行省金銀鐵  
冶提舉司以其事隸各路總管府二十三年韶州路  
曲江縣銀場聽民煽鍊每歲輸銀三千兩

在河南者延祐三年李允直包羅山縣銀場課銀三

錠四年李珪等包霍邱縣豹子崖銀洞課銀三十錠  
其所得礦大抵以十分之三輸官

刑法志曰諸燒造偽銀者徒造賣偽銀買主不知  
情價錢給主偽銀內銷提真銀沒官依本犯科罪  
銅在益都者至元十六年撥戶一千於臨朐縣七寶  
山等處採之

在遼陽者至元十五年撥採木夫一千戶於錦瑞州  
雞鳴山巴山等處採之

在潞江者至元二十二年撥漏籍戶於薩矣山煽鍊  
凡一十有一所

刑法志曰諸出銅之地民間敢私鍊者禁之

鉛錫在湖廣者至元八年定鉛錫課令辰沅靖等處  
轉運印造錫引每引計錫一百斤官收鈔三百文客  
商買引赴各冶支錫販賣無引者比私鹽減等杖六  
十其錫入官

八年十二月宣徽院請以闡遺漏籍等戶淘金以勞民



止之

九年五月罷西番多羅干等處金銀礦戶為民

十年命烏瑪喇採碧甸子於和林

至二十一年雲南會川輸碧甸子一千餘塊二十七  
年十一月罷會川採碧甸子

十一年增費里沙淘玉戶及採朱砂水銀於北京湖廣  
諸處

穆爾瑪哈穆特阿里三人言淘玉之戶舊有三百經

亂散亡存者止七十戶其力不充而費里沙之地旁  
近有民戶六十每同淘焉於是免其差徭與淘戶等  
所淘之玉於古都斯和爾錫喇卜丹三人所立水站  
遞至京師

朱砂水銀在北京者是年命蒙古達實以恤品人戶  
於濟喇敏之地採鍊

在湖廣者沅州五寨蕭雷發等每年包納朱砂一千  
五百兩羅管寨包納水銀二千三百四十兩潭州安

化縣每年辦朱砂八十兩水銀五十兩

十二年九月禁私造銅器

十六年二月撥民萬戶隸明里淘金

二十年三月罷淮安等處淘金官惟計戶取金

七月罷淮南淘金司至二十八年正月罷江淮淘金  
提舉司七月又罷淘金提舉司

六月命福建根訪銅礦

中書省奏銅鐵係國家必用之物除鐵貨已煽鍊外

銅坑未曾經理宜訪產銅之處募人興鍊禁止沮壞從之

八月立懷來淘金所

十二月罷女直出產金銀禁并罷雲南造賣金箔規措所

二十一年二月放檀州淘金五百人還家

至二十五年九月又罷檀州淘金戶順帝至正元年十二月詔革王已延徹爾等所獻檀景等處產金地

土

二十六年四月高麗置銀冶

以高麗國多產銀遣工即其地發旁近民冶以輸官  
二十七年五月尚書省遣人行視雲南銀洞獲銀四千  
四十八兩奏立銀場官

十二月湖廣省上二年宣課珠九萬五百一十五兩  
珠在大都者成宗元貞元年聽民於楊村直沽口撈  
採命官買之

在南京者至元十一年命奇味安山等於松阿哩江  
阿雅勒古江呼蘭果斯江採之

在廣州者採於大步海仁宗延祐四年十二月復廣  
州採金銀珠子都提舉司至七年英宗即位六月罷  
徽政院廣東採珠提舉司以有司領其事泰定帝泰  
定元年七月罷廣州福建等處採珠蠶戶為民仍免  
差稅一年順帝至元三年二月叅知政事納琳等請  
復立廣東採珠提舉司且以採珠戶四萬賜巴延六

年二月出已延為河南省左丞相罷採珠提舉司

元史張珪傳曰泰定元年六月中書平章政事張珪等奏廣州東莞縣大步海及惠州珠池始自大德元年姦民劉進程連言利分蠶戶七百餘家官給之糧三年一採僅獲小珠五兩六兩入水為蟲魚傷死者衆遂罷珠戶為民其後同知廣州路事塔齊爾等又獻利於實勒們創設提舉司監採廉訪司言其擾民復罷歸有司既而內正少卿魏溫

都爾冒啓中旨馳驛督採耗廩食疲民驛非舊制  
請悉罷遣歸民從之

外又有鄂諾多喇琿塔哈三河之珠至元五年徙鳳  
格等戶撈之勝州延州納顏等城之珠十三年命多  
喇卜丹等撈焉

二十八年七月罷江南諸省買銀提舉司

三十一年十月

時成宗  
已即位

弛江西銀冶課額

江西行省言銀場歲辦萬一千錠而未嘗及數民不



堪命命自今從實辦之不為額

成宗元貞二年九月命各路鐵冶官為興煽發賣

中書省言各路係官鐵冶累年積鐵為數甚多雖百姓自備工本二八抽分而納官之數額不盡實請罷其制官為煽賣從之至大德元年十一月又命將見在鐵貨及官鐵從實覈計虧短追賠外仍講究如何興煽備細保結

大德元年十一月禁權豪僧道及各位下擅據礦炭山

塲

十二月命漳州採水晶

福建平章高興言漳州漳浦縣大梁山產水晶乞割民百戶採之帝曰不勞民則可勞民勿取

二年十一月罷徐邳鑛冶所進息錢

七年六月命還西京所鬻瑟瑟

西京道宣慰使帕哈里鼎以瑟瑟二千五百餘斤鬻於官為鈔一萬一千九百餘錠帝命除御榻所用外

餘未用者悉還之至武宗至大元年八月仁宗為皇太子兼尚書令金州獻瑟瑟洞簷事府院請遣使採之仁宗曰所寶惟賢瑟瑟何用焉若此後勿復聞

武宗至大四年四月

時仁宗已即位

買賣銅器聽民自便

仁宗皇慶二年二月諭左右勿鬻回回寶玉

先是至大二年八月帝以皇太子兼尚書令近侍言賈人有售美珠者曰吾服御雅不喜飾以珠璣生民膏血不可輕耗汝等當廣進賢才以恭儉愛人相規

不可以奢靡蠹財相導言者慙而退淮東宣慰使薩  
敦獻玉觀音七寶帽頂寶帶寶鞍却之戒諭如初至  
是諭左右曰回回以寶玉鬻於官朕思此物何足為  
寶惟善人乃可為寶善人用則百姓安茲國家所宜  
寶也

延祐二年正月禁民鍊鐵

七年二月

時英宗  
已即位

括民間係官山場河泊窯冶廬舍

英宗至治二年十二月免回回人戶屯戍河西者銀稅

泰定帝泰定二年十月罷蒙山銀冶提舉司

先是至元二十九年正月江西行省巴延阿剌卜丹言蒙山歲課銀二萬五千兩初制鍊銀一兩免役夫田租五斗今民力日困每兩擬免一石世祖曰重困吾民民何以生從之至是罷提舉司命瑞州路領之文宗天厯元年金銀銅鐵鉛錫歲課之數

金課腹裏四十錠四十七兩三錢江浙江西湖廣河南雲南五省共四百四十六錠一百十六兩二錢四

川省鑄金七兩二錢

銀課腹裏一錠二十五兩江浙江西湖廣雲南四省  
共一千五百五十六錠八十六兩

銅課雲南省二千三百八十斤

鐵課江浙省額外鐵二十四萬五千八百六十七斤  
課鈔一千七百三錠一十四兩江西省二十一萬七  
千四百五十斤課鈔一百七十六錠二十四兩湖廣  
河南陝西雲南四省共四十二萬一千二百二十六

斤

鉛錫課江浙省額外鉛粉八百八十七錠九兩五錢  
鉛丹九錠四十二兩二錢黑錫二十四錠一十兩二  
錢江西省錫一十七錠七兩湖廣省鉛一千七百九  
十八斤

順帝至元元年六月有司言甘肅薩里幹產金銀請遣  
官稅之

至正十二年三月立饒州銅冶

中書省言張理獻言饒州德興三處膽水浸鐵可以成銅宜即其地各立銅冶場直隸寶泉提舉司即以張理為銅冶場官從之

五月罷茂兒棚等處金銀場課

明太祖洪武元年三月近臣請開山東銀場不許

時右丞相徐達下山東近臣因進言舊有銀場可興舉者帝謂銀場之弊利於官者少損於民者多況今凋瘵之餘豈可以此重勞民力言者慙而退



六年四月命各省置鐵冶凡一十三所

初甲辰歲四月中書省言湖廣所屬州縣故有鐵冶請募工興鍊以資軍用從之至是各省置冶江西進

賢新喻分宜湖廣興國黃梅山東萊蕪廣東陽山陝

西鞏昌各一所山西平陽二所

富國  
豐國

太原

大潞州  
通國

澤州益國各一所歲輸鐵共七百八十三萬一千餘斤

至十二年三月又於湖廣茶陵置鐵冶所

十五年四月廉州巡檢王德亨請開階州水銀坑冶不許

德亨言家本階州界於西戎有水銀坑冶及青綠紫泥願得兵取其地以歸於朝帝謂戶部曰盡力求利商賈所為開邊啓釁帝王深戒此遂一開小人規利勞民傷財為害甚大豈可聽耶自後水銀場有四川梁山山西五臺陝西寧羌略陽及雲南等處皆採水銀青綠又貴州銅仁大萬山長官司大崖土黃坑有水銀硃砂場局宣德五年四月裁副使一員其思印江長官司婺川縣板場局亦皆有水銀課景泰三年

命蠲思印江課婺川如舊弘治十八年裁板坑局大使等官令本縣掌印官帶理徵課事

五月廣平府吏王允道請開磁州鐵冶杖而流之

允道言磁州臨水鎮地產鐵元時嘗於此置鐵冶都提舉司總轄沙窩等八冶鑪丁萬五千戶歲收鐵百餘萬斤請如舊置鑪冶鐵帝曰朕聞治世天下無遺賢不聞天下無遺利各治鐵數尚多軍需不乏而民生業已定若復設此必重擾之是又欲驅萬五千戶

於鐵冶中也命杖之流海外

日知錄曰太祖嘗黜言利之御史謂侍臣曰君

子得位欲行其道小人得位欲濟其私行道者

心存於天下國家濟私者心存於傷人害物

三十

年五月御史周姓實錄不載其名此即唐太宗責權萬紀之遺意

也若杖允道流嶺南其不肩好貨之意可謂至深切矣

十二月罷濟南青菜三府採鉛

三府奏歲役民二千六百六十戶採鉛三十二萬三千四百餘斤及今年久鑿山愈深而得鉛愈少乞停其役從之

十八年罷各布政司鐵冶

既而工部言山西交城產雲子鐵舊貢十萬斤繕治兵器他處無有乃復設之二十六年八月復置武昌府興國鐵冶二十七年正月復置吉州豐國富國二鐵冶二十八年二月復置袁州府分宜鐵冶至閏九

月以庫內儲鐵已多復詔罷各處鐵冶令民自採而歲輸課程三十分取其二三十年四月以山西交城之大通吉州之豐國富國江西臨江之新喻袁州之分宜湖廣武昌之興國河南之鈞州新安四川蒲江之新市凡九冶採鍊病民悉革罷之至永樂時又設四川龍州遼東都司三萬衛鐵冶景帝時辦事吏請復陝西寧遠鐵礦工部劾其違法下獄給事中張文質以為不宜塞言路乃釋之

二十年增福建銀屏山銀課額

延平府尤溪縣銀屏山嘗設場局煎鍊銀礦置鑪冶  
四十二座歲辦銀二千一百兩至是增其額時又有  
請開陝西銀礦者帝曰土地所產有時而窮歲課成  
額徵銀無已言利之官皆戕民之賊也不許至永樂  
間有河池民言採礦亦斥之

二十六  
年十二月令雲南麗江府土民以馬代所輸白  
金

西平侯沐春奏麗江府土民每歲輸白金七百六十兩皆摩些洞所產土民以馬易金不諳真偽請令以馬代輸為便許之

成祖初遣中官採珠於廣東

令於珠池起取蜃戶採之每戶給與口糧

永樂十二年遣提督官採辦湖廣辰州貴州銅仁等處金銀場課

時又開陝西商縣鳳凰山銀坑八所福建浦城縣馬



鞍等坑三所設貴州太平溪交趾宣光鎮金場局葛溪銀場局雲南大理銀冶其不產金銀者亦屢有革罷

十九年遣御史及監生等權辦浙江福建銀課

自後各省提督銀課及巡察開採布政司則參議主之按察司則僉事主之廢置不一其御史中官亦時遣焉

仁宗時命坑冶官設守禁者悉予民

至宣德三年閏四月廣東奏採番畧鉛砂六年九月  
河南奏開嵩縣銀礦八年九月四川奏開梁山銅冶  
始皆詔行之尋以所得不償所費而止

宣宗宣德三年九月免江西德興鉛山浸銅丁夫雜役  
二縣銅場歲浸銅得五十餘萬斤所用鐵炭丁夫自  
備其差徭科徵皆不免歲額累虧因詔有司悉免雜  
役稅糧附近輸納仍令廣信饒徽等府辦納鐵炭之  
家免雜役之半稅糧則運輸南京淮安又令增設縣

丞各一員專管納課遞年所欠銅課悉予蠲免

四年三月命巡禁四川會川所屬諸礦

黔國公沐晟言東川府會川衛所屬山內產青綠銀  
銅諸礦軍民往往潛取之其地與雲南武定府金沙  
江及外夷接境恐生邊患乞令四川雲南三司巡禁  
從之

五年十一月命審浙江溫處二府銀冶實弊

布政司王澤言平陽麗水等七縣銀冶自永樂間遣

官開辦共歲額八萬七千八百兩至今十年各場所  
產有僅足額者有不足者有礦盡絕者開辦官督令  
坑首治夫納課不敢稍失歲額賠累之民富者困敝  
貧者逃亡他處坑冶其害亦然乞暫停其役因命戶  
部遣官審其實弊或減額或罷役不可重困吾民  
十年正月

時英宗  
己即位

詔各處金銀硃砂銅鐵等課悉停免

坑冶封閉其開辦內外官員即赴京

時命金銀硃砂辦收在官者俱即解京銅鐵所在寄

庫惟係洪武年舊額歲辦課銀并差發金不在傳免之例至八月管銀坑太監山壽奏雲南新興等七場及四川密勒山場以封閉坑冶鉛礦在庫旁近盜起每至焚燬藏庫戕害守者劫掠鉛礦乞嚴禁捕令總兵三司捕誅之明年正月又罷貴州銅仁金錫局明史食貨志曰歲辦皆洪武舊額也開辦者永宣所新增也

英宗正統三年定私煎銀礦罪

凡福建浙江等處軍民私煎銀礦者處以極刑家口  
遷化外其遁逃不服追問者調官軍勦捕至五年又  
定聚衆偷窺者發雲南邊衛充軍成化元年九月從  
巡撫陝西御史項忠言勅陝西河南及有礦處凡竊  
取者依律治罪仍枷號示衆若三犯則奏請裁處其  
傷人或聚衆不散者處死六年又令偷掘銀礦初犯  
照例枷示仍充發遼東其有資給衣糧器具及走報  
事情者照初犯例

九年閏七月命戶部侍郎王質往浙江福建重開銀場  
洪武間福建各場歲課銀二千六百七十餘兩浙江  
稅課二千八百餘兩永樂間福建增至三萬二千八  
百餘兩浙江增至八萬二千七十餘兩宣德間福建  
又增至四萬二百七十餘兩浙江又增至九萬四千  
四十餘兩自是地方竭而民不堪矣帝初即位下詔  
封坑冶民大蘇息至是有盜礦脉相鬪殺者御史孫  
毓福建叅政宋彰浙江叅政俞士悅各言復開銀場

則利歸於上而盜無所容事下二處三司議浙江按察司軒輓等奏復開銀場雖一時之利然凡百器具皆出民間恐有司橫加科斂人心搖動其患甚深為今之計莫若擇官典守嚴加禁捕則盜息矣朝廷是輓言已而給事中陳傅復請開場中官與言利之臣相與附和乃命質往經理合福建歲課銀二萬一千一百二十餘兩浙江四萬一千七十餘兩雖較宣德時減半而較洪武時已增十倍矣至内外官屬供億



費殆過公稅厥後民困而盜益衆至十三年八月遂有鄧茂七之亂

十年令各銀場額課不敷不許派民包納

凡額數不敷皆許於別坑有礦處煎補又不敷者具奏處置其提督官吏及諸坑首匠作稱課不及額掊斂民財侵盜官銀者依律治罪

景帝景泰元年二月復罷採浙江福建諸處銀課

先是福建賊鄧茂七以開礦作亂正統十四年正月

免浙江福建銀課二月御史丁瑄等斬茂七於延平  
始安戢至是從御史畢鸞等奏取回開辦官令都  
布按三司巡礦官提調各府縣護守坑場又從僉都  
御史陳詔言以浙江處州銀課二萬五千二百兩即  
留本處賞給有功民快人等

六年十二月擢獻寶石屠宗順屠芝官

升宗順為副千戶芝為百戶仍於御用監辦事

英宗天順二年仍開浙江福建等處銀礦

自景泰元年封閉銀場後尋以盜礦者多從兵部尚書孫原貞請開浙江銀場因并開福建至是各遣內使一員辦事官一員照舊煎辦令各鎮守太監提督至四年命中官羅永之浙江羅珪之雲南馮讓之福建何能之四川課額浙閩大畧如舊雲南十萬兩有奇四川萬三千有奇總十八萬三千有奇

四年命雲南雜犯死罪以下無力者俱發新興等場充礦夫採辦銀課

七年復詔封閉各處坑塲停止煎辦銀課取回內外官員

八年遣內使一員監守廣東平江珠池

自成祖初遣中官採珠後宣宗時有請令中官採東莞珠池者繫之獄景泰中嘗遣中官採珠於雷廉平江等珠池至是復有採珠之役因遣中官監守之至成化九年令監守廉州楊梅珠池奉御兼管永安珠池二十年又遣中官一員守雷州樂民珠池二十三

年令取回廣東新添守珠池官弘治七年又遣中官一員監守楊梅青鶯平江三珠池兼巡捕廉瓊二府帶管永安珠池

梁斗輝曰按粵通志珠池率十年一採守池中官并參隨人員每歲供應等費銀萬餘兩計十年則為數十萬餘而臨採復費以萬計雖有所得不償所失矣

憲宗成化三年仍遣內使提督浙江福建銀課四川雲

金  
卷二十三  
南令鎮守中官提督採辦

時又開湖廣金場武陵等十二縣凡二十一場歲役民夫五十五萬死者無算得金僅五十三兩於是復閉而浙江銀礦以缺額量減雲南屢開屢停

九年三月減雲南銀課十之五

巡按御史胡涇等奏雲南所屬楚雄大理洱海臨安等衛軍全充礦夫歲給糧布採辦之初洞淺礦多課額易完軍獲衣糧之利未見其病近日洞深利少軍

士多以瘴毒死煎辦不足或典妻鬻子賠補其數甚  
至流徙逃生哨聚為盜以致軍丁消耗乞行停免詔  
減銀課之半礦夫稱之

十七年定雲南私販銅貨罪

自成化五年定四川軍民偷採白銅者為首枷示依  
律治罪至是因封閉雲南路南州銅場免徵銅課乃  
定路南凡私販銅貨出境本身處死全家發烟瘴充  
軍二十年又定雲南寧州等處軍民客商有偷採銅

礦私煎及潛販出境者照路南州例究治

孝宗弘治五年詔豁減浙江福建諸處歲辦銀課仍填塞礦穴取回諸添設巡礦官

時雲南減二萬兩溫處萬兩餘罷浦城廢坑銀冶四川山東礦穴亦先後封閉十八年二月又禁密雲私開銀場

大學衍義補曰聖王取民之賦無所謂金銀銅鐵之征者豈不以山澤之利取之有窮而生之不繼



乎我朝坑冶之利比前代不及什之一二間或有  
之隨取隨竭曩者浙之溫處閩之建福開場置官  
內臣守之憲臣督之而所得不償所費乃多行革  
罷均其課於民賦中然今不徒無其利而又受其  
害各處不逞之徒往往以競利起亂焉所宜嚴守  
捕法築塞之柵塹之庶不至聚衆爭奪貽禍於一  
方生靈耳

十二年罷廣東監守珠池中官

十三年四月申定盜掘礦砂罪著為例

凡盜掘銀銅錫水銀等礦砂但係山洞捉獲曾經持杖拒捕者不論人之多寡礦之輕重及聚衆至三十人以上分礦至三十斤以上者俱不分初再犯發邊衛充軍若不及數人不拒捕初犯枷號發落再犯免枷號亦發邊充軍具私家收藏道路背負者止理見獲照常發落不許巡捕人員逼令展轉攀指違者叅究治罪

十一月免雲南判山等場銀課

巡撫都御史李士實奏雲南銀場凡九近年礦脉甚微各衛俱以礦夫口糧賠納歲折銀三萬四百三十四兩名曰礦夫口糧餘丁或三五人朋當一名歲辦銀二萬一千九百四十五兩名曰夫丁乾認今判山窩村廣運寶泉四場礦脉久絕賠納無已乞自十二年為始將四場銀課暫免軍丁退還各衛備操口糧移文有司收貯以備軍餉則減者少而增者多矣部

覆從之

十四年定盜珠人罪例

除將軍器下海為首真犯死罪外但係在珠池盜珠  
駕黑白艚船專用扒網持杖拒捕聚至二十人以上  
盜珠至十兩以上者俱照盜礦例發雲南廣西邊衛  
充軍其不及數不拒捕者初犯枷號再犯充軍如係  
附海居民用手拾蚌取珠所得不多者免枷示照常  
發落

十七年二月廣東民因開鐵冶作亂旋討平之

歸善縣清溪等處山產鐵礦有巫琮招古三仔等就  
山煽鐵因嘯聚為盜官軍捕之獲三仔等會番禹民  
張文俊等奏請立官鑪納課土人唐大鬚者亦率其  
黨與焉文俊等於課外索賂大鬚等憾之入烏洋潭  
為盜三仔遂逸去與大鬚合徒黨日盛僉事徐紘等  
督軍捕之不克總督劉大夏馳榜招降之既而齎榜  
者索賄不已大鬚復叛調兵會勦始平之

武宗正德三年令封閉河南宜陽等縣洞穴

宜陽之趙保山喚鄉窪永寧之秋樹坡盧氏之高賢  
兒嵩之馬槽山等洞俱照舊封閉時又從中官秦文  
等奏復開浙閩銀礦既而浙江守臣言礦脉已絕乃  
令歲進銀二萬兩劉瑾誅乃止

六年封閉雲南銀場九處免其課

至九年軍士周達又請開雲南諸銀礦并銅場青綠  
詔可遂次第開採十五年又令雲南銀礦新興場及

新開處所一併封閉以後不許妄開嘉靖初又命閉雲南大理礦場

十四年六月置廣東鐵稅廠以鹽課提舉司領之  
廠一所置省城外以鹽課副提舉專管鐵課其惠潮  
揭陽三處及雷瓊等行鐵地有走稅夾帶漏報諸弊  
者俱依鹽法事例施行

世宗嘉靖八年八月提督兩廣侍郎林富諫採珠不從  
珠池自天順採珠後弘治十二年又採歲久珠老得

最多費銀萬餘獲珠二萬八千兩遂罷監守官十五年十一月又以廣東守臣言停南海採辦正德九年復詔採辦嘉靖五年又採之珠小而嫩亦甚少至是又復詔採富因上言祖宗時率數十年而一採未有隔兩年一採者五年之役死者五十餘人得珠僅八千八十兩天下謂以人命易珠恐今雖以人易珠亦不可得給事中王希文亦言雷廉珠池祖宗設官監守不過防民爭奪正德間逆豎用事傳奉採取流毒



海濱陛下御極革珠池少監未久旋復驅無辜之民  
蹈不測之險以求不可必得之物而責以難足之數  
非聖政所宜有皆不聽

臣等謹按經世實用編梁斗輝謂嘉靖元年諭廣  
東看守珠池太監不許干預廉瓊高雷等地方事  
嚴其防也至八年又納張璉胡世寧言罷各鎮守  
中官并採珠間欲用珠則發銀買於商為數有限  
百年大患一旦掃除是八年採珠即於本年罷也

與志異斗輝廣東新會人親歷見聞自當有據

九年今蘭州等處獲盜礦者照腹裏例治罪

蘭州等隘口凡渡黃河出境入境齎有礦砂及燒成銀兩并挖礦器具者不分人之多寡礦之輕重及初再犯或持杖拒捕者俱依腹裏盜礦例充發其把隘官兵縱放與守備官不嚴隄防者俱叅究治罪

十六年命廣開山東等處銀礦

山東巡按李松言沂州寶山開礦七十八所得白金

一萬一千三百兩宜將龍爬山石井山以次開採帝  
責戶部推諉命撫按力任之至十九年又令四川建  
昌衛并會川密勒山礦場及陝西甘州大黃山等礦  
洞俱照舊封閉自後薊豫齊晉川滇所在復進礦砂  
金銀俱議開採以助大工既獲玉旺峪礦銀又諭閣  
臣廣為開採戶部尚書方鉞等請令四川山東河南  
撫按嚴督所屬一一搜訪以稱天地降祥之意於是  
公私交騷礦利天下漸多事矣

三十四年開建寧延平諸府鐵冶

自後鐵冶率因舊制無特開者

四十三年二月始命廣採雲南寶石

時雲南進寶石七百六十餘兩帝嫌其碎小命採青紅色二寸黃色徑寸并紫英等石以獻至十月又諭

戶部發銀五萬兩買黃金香料四十五年二月戶部又進黃白玉五百餘斤仍命多行訪買黃玉并採大小珠一號至十號者以進三月戶部進珠一百三十

兩有奇仍再命取五號者五千顆九號者二萬顆五月又命戶部催買雲南九成金二千八成七成金三千銀萬兩并催廣東雲南珠石未至者

食貨志曰世宗中年以後營建齋醮採木採香採珠玉寶石吏民奔命不暇用黃白蠟至三十餘萬斤沈香降香海漆諸香至十餘萬斤又分遣購龍涎香十餘年未獲使者因謂海舶入澳久乃得之方澤朝日壇爵用紅黃玉求不得購之陝西邊境

遣使覓於阿丹去土魯番西南二千里太倉之銀  
頗取入承運庫辦金寶珍珠於是猫兒眼祖母碌  
石綠撒孛尼石紅刺石北河洗石金剛鑽朱藍石  
紫英石甘黃玉無所不購云

三月浙江江西礦賊作亂命設兵備官禁閉山場

時開化德興礦賊劫掠徽寧諸處其勢日熾二月終  
乃突入婺源焚燒縣治大掠而去兵部議設兵備副  
使一員於浙江駐劄衢州以杜盜源其雲霧山礦洞

宜嚴加封閉從之

穆宗隆慶二年九月諭買猫睛球寶石從給事中魏時亮言罷之十二月復諭收買珠寶石

時亮言猫睛無用物也而一顆價至百金孰非生靈之膏血乎天下旱荒不言賑恤外夷方強不言防秋而急急於珠寶之妄費何倒置如此帝命罷之至十二月復諭收買時亮又上疏諫帝切責之又尚衣太監崔敏以急缺年例黃金命嚴徵以進給事中李已

劾敏假公用以充私橐誤國欺君速宜罷斥不聽下  
已獄時又有給事陳吾德亦諫購珠寶削籍六年詔  
雲南進寶石二萬塊廣東採珠八千兩

神宗萬曆四年六月承運庫內監請採買金珠寶石從  
之

帝初即位停罷雲南進寶石廣東採珠至是太監崔  
敏等以大婚用金珠寶石等引例請行戶部採買給  
事中光懋言事關君德雖微必矜費出民膏雖公必



惜頃各邊年例約於古而倍於今而議修河開海蠲賑無虛日且兩廣軍興捉襟露肘乃忽責辦金珠寶石夫器用財賄燕私等物內府所掌大司農則典邦計以供軍國之需者也俾之貨買金珠等豈可為訓帝不允御史張憲翔亦疏請停止僅報聞而已自後以太后进奉諸王皇子公主冊立分封婚禮令歲辦金珠寶石二十七年六月以採買珠石典禮所需順天府坐視玩法奪府尹諸臣官有差仍督商人隨買

隨進於是戶部月進珍珠香料并琥珀等珠寶價增舊二十倍尚書陳蘄言庫藏已竭宜加撙節中旨切責至末年至移濟邊銀供採造焉

二十二年九月令撫按官勘報各處礦洞

自隆慶初罷薊鎮開採南中諸礦山亦勒石禁止礦弊稍息萬曆十二年奸民屢以礦利中帝心諸臣立陳其弊帝雖從之意怏怏至是復有開礦之議戶部議以開礦所係重大廷臣得之耳聞撫按得之目覩

應令親勘情形獲利而又能弭害方可舉行乃下是  
詔尋以撫按玩視奪俸二月

二十四年詔開各處礦冶

指揮王允中奏開山東青州府沂水等州縣礦百戶  
吳應麒奏開山西平陽府夏縣等處礦指揮陳永壽  
等奏開河南等處礦千戶鄭一麟等奏開橫嶺路礦  
千戶余潤奏開涑水房山銀礦百戶李方春奏開永  
平銀礦千戶陶壽等奏開房縣等礦指揮袁友松等

奏開山東文登縣礦千戶李綸奏開房山縣礦指揮  
曾守約奏開山東青州臨朐縣七寶山等處礦百戶  
王果等奏開山西太原平陽潞安孟曲沃翼城平陸  
夏等處礦百戶段大奎等奏開陝西西安等處礦百  
戶邱繼勲等奏開藍田等處礦百戶曲守正奏開信  
陽等處礦太監田進奏開薊永等處礦皆詔行之

山西巡撫魏允貞奏停開礦之役曰開礦一事大  
約武臣謂其有利部臣科臣謂其無利有害利少

害多陛下乃從其言開者而不從其言罷者豈在  
廷皆不達國計獨此武弁數言可信耶臣竊謂礦  
自開闢以來即有古聖帝明王不聞開採良以所寶  
者常在善人不在珠玉且陛下亦安用此開礦為  
也今富有四海米帛則取諸吳越絨紬則取諸秦  
晉金則取之滇扇則取之蜀磁器則取之江西太  
倉為庫太僕為廐光祿為厨何求不得而必以開  
礦為利乎即大工肇興戶兵工三部自足給之其

有不數四方且開例百官且開俸必無藉於礦也  
況歲徵多咎水旱告災天鼓時鳴地震不已流星  
無度寇倣日至小民嗜利而不憚為盜若天性然  
今言開礦者皆利臣絕無廉節遠識所用皆礦徒  
習於作奸亡命安保無事於異日萬一關中有急  
山西近河諸處皆屬可慮而內地素少兵馬當此  
時內外東西將何以防禦乎且物產有限民欲無  
窮計開礦近不可過終年遠不過二三年彼時差

官已去礦徒猶在此輩豈能歸故里事農業者正  
恐不知所終矣乞將倡議之人置諸法即停其役  
如必以開礦為足國裕民大計請先開一方以驗  
之如果有利然後盡開由河南而北直隸山東山  
西未晚也倘以諸武臣為必可信以臣愚闇書生  
不知大利乞即罷去別遣有心計善變通者使撫  
山西與閩人武弁言利之臣共事可耳

二十五年二月又命開採續報礦洞

山西開礦太監張忠奏進夏縣三岔等洞樣銀及砂  
并開各洞事理及官民續報礦洞命開採之五月百  
戶王遇桂奏開寧國池州等處銀礦百戶張傑奏開  
山東濟寧等處金銀鉛礦百戶韓應桂奏開湖廣德  
安等處銀礦及大青銅錫諸物嗣是百戶劉心澤奏  
開浙江衢州等處產金銀礦百戶張欽奏開河南彰  
德等處礦洞三十二所俱命內官一併開採是年浙  
江巡撫劉元霖奏全浙地方半濱江海即有山塲石



多土少前曾開採得不償失正統時礦盜葉宗留等  
交結福建劇賊鄧茂七聚衆作亂殺傷官兵此皆往  
事有可徵者况今倭謀叵測大汛戒嚴將備內則外  
憂島夷之乘虛將防外則內虞奸徒之啟釁乞念兩  
浙為財賦重地防汛屆期亟停開礦或待倭款既堅  
採木已竣年歲豐稔方議奉行巡按方元彥亦奏兩  
浙開採之礦利杭嚴所屬不足償所費十之二湖衢  
所屬不足償十之三金華所屬不足償司礦一日之

費乞權其得失河南巡按姚思仁亦言開礦大可慮者八俱不報

姚思仁疏曰中原八郡實天下樞機臣自入境以來巡行郡邑問民病苦其開礦之大可慮者有八礦盜嘯聚召亂可慮一也礦頭累極土崩可慮二也礦夫殘害流亡可慮三也雇民糧缺噪呼可慮四也礦洞徧開浪費可慮五也礦砂銀少逼買可慮六也民皆開礦失業可慮七也奏官強橫激變

可慮八也今礦頭以賠累死平民以逼買死礦夫以傾壓死以爭鬪死自初開至今已踰八月而所解不過四千及今不止恐禍起蕭牆變生肘腋雖傾府庫之藏竭天下之力亦無濟於存亡矣

二十六年六月開採雷廉瓊三府珠池

兵仗局內使王朝奏開珠池命中官李敬督原奏人採辦之兩廣總督陳大科上疏諫止不允至二十七年五月敬進大珠三中珠一千一百十兩六月又進

珠五百二十七兩有奇二十八年七月中官李鳳又  
進珠二千四百七十三兩給事中包見捷力諫不納  
二十九年三月湖廣開礦內官陳奉激民變命回京

先是開採礦銀中使四出昌平則王忠真保薊永房  
山蔚則王虎昌黎則田進河南之開封彰德衛輝懷  
慶葉縣信陽則魯坤山東之濟南青州濟寧沂州滕  
費蓬萊福山棲霞招遠文登則陳增山西之太原平  
陽潞安則張忠南直之寧國池州則郝隆劉朝用湖

廣之德安則陳奉浙江之杭嚴金衢孝豐諸暨則曹  
金後代以劉忠陝西之西安則趙鑒趙欽四川則邱  
乘雲遼東則高淮廣東則李敬廣西則沈永壽江西  
則潘相福建則高寀雲南則楊榮皆給以關防并偕  
原奏官往礦脉微細無所得輒勒民償之而奸人假  
開採之名乘傳橫索民財陵轢州縣有司卹民者罪  
以阻撓逮問罷黜暴橫酷虐帝縱不問至是奉在湖  
廣參逮僉事馮應京激變地方殺傷多命百姓喧譁

甘心於奉奉避匿楚府得免又疑巡撫支可大庇護  
焚其公解科道連章奏請未下尋以湖口征稅太監  
李道奏始令巡撫遣官送奉回京處分而以守備內  
官杜茂兼理礦稅至七月巡撫湖廣趙可懷疏論奉  
不報

趙可懷疏曰楚地困苦極矣以礦言之初議四六  
分而山不皆出礦礦不皆出銀年年開挖生長難  
繼是以不能四六分而買砂而賠銀矣既而賠礦

產盡遂令合縣包賠復有奸人乘機借勢指富家  
大族則曰因私開礦取其貲入官不從禍立至良  
宅好墳則曰下有礦取其貲方免不從即掘它再  
抗禍立至矣此皆土著者報復嫌怨或誣告家主  
或其親朋小民徑挈紳士脅以叅奏家家破碎人  
人受怨而羣奸猶未厭也或執砂地名派定歲納  
金若干或發零銀買金若干或指稱有金銀二窖  
欲掘之而詐銀二千兩又或指家有金帛有奇玩

或募金以數百人圍而搜之有司睥睨不敢救男  
子幸脫而縛其婦女甚至斷人手足沒之江流夫  
奉固一虎耳委官之為虎者又數百人叅隨各役  
之為虎者又千數百人楚人幾何日受吮嚼至數  
年久也乞念根本重地曲加哀憐即罷礦稅則無  
疆之福也

三十二年停廣東珠池採珠

先是廣東巡按李時華奏防池事宜雷廉西海珠池



錯落地之南島孤懸名曰瀾州峙屹中央內有腴田  
千餘畝又有港澳可容數百舟沿海盜珠者皆視為  
窟宅先年添設遊擊扎守之數年來賊稍屏跡近因  
內臣李敬於白龍廠設立廠舍受珠之際官私船隻  
雲集人衆易以生變議為兩全之策從之乃命遊擊  
移守白龍廠封池後仍回瀾州是年始停採珠

梁斗輝曰採珠以船官造船計費不貲遂轉取民  
間彼民俯仰所資者獨此船一報船戶里井騷然

巧者或賄吏胥而漏網愚者僅以身待命則擄船之害也採珠之人裹糧揚帆曾無約束掠鄉村劫客商民房被燒民被打傷而總兵叅將等雖經目擊莫可誰何則縱劫之害也珠池市舶各有分任乃市舶中使瞰重利欲兼收之必至相角不下延蔓無已茫茫大海殺人如麻則互爭之害也始議官四民六皆稱便矣然梃子有包藏督哨有搜括叅隨有背手至中使前僅循資交納而中使復大

半歸已橐朝廷無實利而受空名則騙匿之害也  
私販雖有禁而遠方來販者率市井無賴之人一  
入其手視為得贏有飄然遁耳乃今不問之若輩  
而聽棍徒妄指富戶曰是曾市珠者也假威凌虐  
何求不得則嫁禍之害也夫國家採珠本以待用  
詎意為害至此哉

又曰廉州志載郡無耕稼所資珠璣然曩之採珠  
祇沿海蜚戶以銅艘凌萬頃入尋丈採之人猶畏

其難而不敢自招撫李茂始以竹為梃維以絛纜  
投之海中順風遡流力不勞而得甚奢自鮫人蕩  
子至閭巷小民皆安然為之然漭濊險阻之區狂  
飈乍發翦焉傾覆害一或屬有天幸得返故里身  
利兩全華衣甘食適長其奢淫僭踰之習害二若  
珠船到岸債主填門取償胥徒乘機嚇噬又分珠  
多者或能自愛惜猶以羨補拙否則三五為羣未  
抵家而貲財已盡矣放辟邪侈何所不為害三且

名為採珠實則行劫此等不逞之徒居恒猶攘臂攫金探囊覬況島嶼無人之境何所顧忌害四又其甚者洋海一帶東達日本西接安南萬一夷情叵測與狡獪者援引為奸乘潮擊槳瞬息千里重為內地憂害五五害如此則雖聽民自採亦有所不可者

三十三年二月大同巡撫張悌請礦課歸稅使不報時以礦使弗戢有廣昌之變悌因言歲包礦課業有

定數應歸併稅使為便疏留中至六月禮部以陵寢風電郊壇雷火言第一關失莫如礦稅每迷惑聖心以致諸事阻遏不行乞先罷採權以應天變亦不報十二月諭戶工二部凡礦差內外官並令回京其礦洞悉令封閉

自二十五年至是年諸璫所進礦稅銀幾三百餘萬羣小藉勢誅索不啻倍蓰至是以礦砂微細不償所費始停免焉

罷採廣東珠池雲南寶井

時以皇長孫生詔廣東珠池蜃蚌日虛不宜竭澤即令封閉雲南寶井干涉夷方易亂難安今礦洞既閉一體停止至四十一年以指揮倪英言復開廣東珠池

熹宗天啟三年正月順天巡撫岳和聲請設冶局從之  
和聲奏灤州所轄偏山鉛礦堪以採鍊查遵化舊亦  
有鐵礦後竟封閉宜各設一廠採鑄以佐軍需更聞

灤州有銅礦一所質粗脉微工價稍費當銅絀之日  
堪為鑄錢之資宜專委兵工司官一員刻期採鑄鉛  
鐵隨給局匠打造盔甲刀銃諸器及鉛彈等物以濟  
寶源阜財之用命議行之至七年七月太監楊潮奏  
一片石西界忽有鉛礦可資火器帝命會同督撫道  
臣開採務嚴杜軍民侵盜其安鑪煅法啓閉委官俱  
如議行

七年三月豐城侯李承祚請開珠池銅礦不許



吳肅公讀書論世曰天啓朝姦民陳有繼請開採  
帝怒而誅之吾宣崑山故有銀礦明末有芮四者  
獻策中官中官以已貲率百人開採恣擾鄉民得  
不償失芮四亦為鄉民毆斃噫即使開採有微利  
而繹騷煩擾召盜府奸頻使鄉里受無窮之害况  
得不償失官民交受其累耶

愍帝崇禎元年四月濟陽衛指揮卓銘疏請開採奪  
其俸

帝以國家經費本有定額偶當時絀劑量亦自有權  
卓銘欲借變通之名興開採之役生事釀害殊干法  
紀命奪俸五月并禁以後瑣屑言利者至八年三月  
宣大總督楊嗣昌請開金銀銅鐵錫鉛諸礦以誘流  
賊解散時論非之

臣等謹按愍帝紀九年十月命開銀鐵銅鉛諸礦  
殆從嗣昌請也

十二年十一月巡撫湖廣陳睿謨請免臨武藍山開礦

報聞

睿謨言臨藍係江粵接壤四方亡命駢集項者劉新  
宇等一方倡亂四省震驚究其禍源實因上下百里  
礦洞二十餘處狂徒數百倏忽千萬七寶山黨集而  
桂陽圍黃岡溫塘羣聚而常寧破金竹麻江積寇而  
高紫空此皆已然之驗一一可指者除患消萌懲前  
毖後宜嚴禁開礦為要務

臣等謹按睿謨疏特欲嚴禁開礦以杜盜源而是

時流賊之勢已熾亦無暇計及礦徒矣



欽定續文獻通考卷二十三